

Sr. Booshi Wever, Parlamentario Independiente y lider di UPP

“UPP ta den fase final di nos programa pa eleccion September 2013”

ORANJESTAD -- Manera Union Patriotico Progresista (UPP) a anuncia, nos ta den e fase di terminacion di nos programa di partido, cu lo mester sirbi como guia pa e eleccion venidero, asina Booshi Wever, Parlamentario Independiente y lider di UPP a duna di conoce.

Hunto cu e programa aki UPP ta presenta tambe un manifiesto, den cua su puntonan di bista ta wordo menciona.

PROYECTO NOS PATRIA

E programa di partido ta hiba como titulo “Proyecto Nos Patria”, y nos ta kere cu ta esencial pa nos partido tin su puntonan di salida bon defini. Ya caba den un comunicado anterior nos a presenta nos puntonan di salida riba e tereno di libertad politico di e ciudadano y di nos pueblo.

Banda di e parti aki nos tin tambe e otro dos terenonan cu ta esun di condicionnan basico di seguridad social y calidad di bida, pa un bida humano y comunitario, y tambe nos autonomia politico.

SIGURIDAD BASICO SOCIAL

Pa loke ta concerni e condicionnan di seguridad basico social, UPP ta kere cu mester garantiza y promove trabou, husticia social, progreso, bienestar y seguridad di tur ciudadano.

Ora ta papia di trabou, UPP ta kere cu ta deber di Gobierno pa na prome

luga garantiza oportunidad di trabou pa e trahadonan local prome. Hunto cu esaki ta obvio cu mester hiba un maneho di admision balansa pa proteha nos forsa laboral local.

CAPACIDAD DI CARGA

Crecemento di poblacion, pa medio di inmigracion mester ta uno cu ta wordo hiba riba un base responsabel, unda cu e maneho ta tene cuenta cu e espacio cu tin pa provisionnan general pa futuro, manera enseñanza, pension, servicio social, seguro medico, tereno, vivienda y nos medio ambiente. Cu otro palabra, mester tene cuenta cu e capacidad di carga di nos pais, mirando su espacio y recursonan limita. Esaki ta trece cun’e cu mester traha na stimula un desaroyo duradero cu tur respet pa mama tera y naturaleza.

OPORTUNIDAD PA PUEBLO

Por lo general UPP ta respeta tur forma di iniciativa particular cu ta necesario pa contribui na genera mas oportunidad pa nos pueblo y yuda den e crecimiento economico, adelanto social y spiritual di nos pueblo.

Esaki mester sosode cu sosten y guia di Gobierno y cuna final lo mester desboca den e prosperidad y bienestar pa nos pueblo. Pues ta trata aki di un situacion unda e inversionista, tanto esun local como stranhero, tin espacio pa haci ganashi, pero semper poniendo nos hendenan y nos mama tera central

(People, Planet & Profit).

CALIDAD DI BIDA

Pa por garantiza e nivel di seguridad social aki y e calidad di bida pa nos comunidad, ta esencial cu Gobierno di su banda tambe ta ricibi su entrada cu ta toke (su fair share), mientras cu e ciudadano por probecha lo maximo di loke cu e ta gana.

Gobierno cu e entrada cu e ta ricibi, mester ehecuta maneho, plan- y servicionan na bienestar di tur esunnan cu ta biba riba e baranca aki. Mester ta un sistema husto y balansa na unda cu ningun ciudadano ta wordo privilegia riba e otro.

AUTONOMIA ESTATAL

Den cuadro di loke a keda presenta aki riba pa loke ta e seguridad social, y tambe pa loke ta e libertad politico cu nos a presenta den e prome articulo, UPP ta considera e autonomia estatal y politico di nos pais condicionnan hopi importante pa por garantiza esakinan.

UPP ta considera e autonomia di Aruba, manera logra bou guia di Sr. Betico Croes d.f.m. na e Conferencia di Mesa Rondo na 1983, como un logro importante y determinante den emancipacion politico y estatal di nos pueblo. Esaki por wordo considera como un bien general di e pueblo di Aruba, cu UPP lo defende na tur momento y na tur nivel pa salvaguardia

y engrandece e autonomia aki. Un autonomia cu mester ta basa riba respet mutuo, igualdad, y cooperacion entre e paisnan den Reino, mescos tambe por medio di cooperacion regional y internacional.

MESUN POLITICA

Apesar cu aworaki tin mal gobernacion, mester reconoce, cu e status autonomo a duna Aruba instrumentonan importante pa por stipula su mesun politica y cu a percura pa un desaroyo socio-economico aceptabel, compara cu otro paisnan den cercania. Ta importante pa salvaguardia e instrumentonan aki. Pues exigencia di UPP ta respet pa nos autonomia cu nos a haya desde aña 1954, como parti di Antiyas, y na 1986 como pais autonomo den Reino.

LGO-PLUS

UPP ta kere cu mester existi un partnership igual den Reino, na unda cu ningun ta mas cu otro.

Mientras pa loke ta e relacion cu Europa, UPP ta kere den un relacion di LGO-plus, enbes di esun di UPG.

UPP ta pidi pa Pueblo keda pendiente pa su siguiente comunicadonan unda ta cuminsa elabora mas riba e parti di e programa di partido. Pa cualkier pregunta of sugerencia, por tuma contacto cu UPP pa medio di su e-mail upprogresopaaruba@gmail.com. □